

Tyeji

Oovdiš ulmuuh rahtii puoh jieš, sij korruu pihtsijd já toijuu puoh anneemkáálvuid. Almaah rahtii korrâtuojijd, mutâ ohtâ olmooš ij tarbâšâm mättid jyehi áinoo káálvu jieš rähtid, motomeh ulmuuh lijiii čeejih muorâtuojijn, nubeh lijiii rävdijáššeeh. Nissoonolmooš koolgâi rähtid puoh timmâtuojijd, maatii sun teikkâ ij. Suujân toos saatii leđe tot ete timmâtyejeh lijiii jyehipiäiváliih anneemkáálvuh ko korrâtuojijn lâi eenâb kuhheeb kevttimäigi.

Tááláá tuojum lii nubásmâm, ovdâmerkkân tääl ij lah innig tárbu káárvuid kuárruđ tegu ovdâl. Mááccuh lii čingâpiivtâs, mutâ ovtâskâs káárvuid tegu sovsammuid kal kevttih argâpeeivist.

Sämmilâš šoddâdemist merhâšittee lâi, ete pärni uásálistij rävisulmuu pargoid. Sun poorgâi oovtâst rävisulmuin, čuávui miel di tassaaš ete čaaitij perustume jieš-uv keččâliđ. Rävisolmooš enni teikkâ eeči, ákku teikkâ äijih adelij páárnán máhđulâšvuodâ keččâliđ. Tááiđui lasânem miel di pärni uázui eenâb ovdâsvástádâs já váddâsub pargoid.

Ovdâsvástádâs adelem visesmittii ete pärni viigâi toimâttiđ pargo nuuvt pyereest ko máhđulâš. Rävisolmooš muštâlij porgâđettijn porgâmvuovijn, amnâsijn já pargoniävuin já meiddei tast, maid ij kánnát porgâđ. Siämmást pottii oovdân joskis tiäđuh: maht eidu mii suuvâst läävejehe taam porgâđ, maggaar vyevih mist láá já maht toh spiekâsteh eres perruin teikkâ suuvâin.

Hárjánem pehti oppâm já čuávumijn oppâm vyevi kánnát sirded tááláá säämpárnái šoddâdemán. Lii tehálâš sirded párnáid tááiđuud já tiäđuud tuojumist já tuojij jiešvuodâin. Tot vaattâ rävisulmuin háálu tuojjuđ, toollâđ amnâsijd olámuddoost já muštâliđ tuojijn. Ko pärni tobdá, ete haaliđ keččâliđ, sust lii toos máhđulâšvuotâ peerusthánnáá tast, lii-uv vuávájum tuojumäigi vâi ij.

Bigga-Helena Magga